

四庫全書

集部

欽定四庫全書

御定歷代題畫詩類卷一百目錄

獸類

題麟鳳圖

宋朱芾

題異獸圖

明歸有光

題獅子搏虎圖

明王世貞

縛虎圖

宋司馬光

虎圖

宋王安石

陰山畫虎圖

宋王安石

題畫虎

宋樓鑰

和南山弟虎圖行

宋何夢桂

題伯時畫揩痒虎

宋黃庭堅

題伊陽楊氏戲虎圖

元元好問

趙生水墨虎

元劉因

趙邈齟伏虎圖行

元郝經

趙邈齟虎圖行

元王恽

畫虎圖

元虞集

題黃敬申虎圖

元虞集

題虎圖

元陳旅

題百禽噪虎圖

元張渥

畫虎

明汪廣洋

虎引子圖

明王佐

虎圖

明方孝孺

題虎

明周述

顧進士所藏畫虎

明王直

題李都督虎

明邱濬

題畫虎

明劉溥

題虎圖

明程敏政

畫虎

明吳寬

題內苑蓄虎圖

明廖道南

畫虎行

明陸燦

題虎

明林景清

為舟人萬氏題象圖

明張以寧

黃精鹿

宋蘇軾

右丞文獻公著色鹿圖

元元好問

子和麋鹿圖

元元好問

題小薛王畫鹿

元鄧文原

畫鹿行

明許穀

題易元吉畫麋

宋陳與義

次韻三司蔡襄獐猿

宋趙抃

觀易元吉獐猿圖歌

宋秦觀

題胡處士猿麋圖

宋陳造

和楊龍圖麋猿屏

宋蔡襄

酬李公擇謝子贈范李猿獐

宋郭祥正

題易元吉獐猿兩圖

宋范成大二首

題獐猿圖

金完懷英

惠崇獐猿圖

元元好問

畫猿

元劉因

獐猿圖

元表桷

畫猿

元虞集

孝猿圖

元程鉅夫

題猿圖

元馬祖常

題猿

元李祁

猿鹿圖

元牟嘯

胡孫圖

元牟嘯

題山月猿圖

元僧恕中

題周進士古木清猿圖

明黃玄

題水底猿捉月圖

明樊甫

題畫兔

宋陳與義

畫兔

金李純甫

畫兔

元程鉅夫二首

題畫兔

元楊載

題畫兔

元李祁

畫兔

元吳師道

黃荃子母兔

明高啓

畫兔

明傅珪

玉兔圖

明廖道南

題畫兔

明張鳳翼

題扇芙蓉兔

明祝允明

御定歷代題畫詩類卷一百目錄

欽定四庫全書

御定歷代題畫詩類卷一百

獸類

題麟鳳圖

宋
米芾

非篆非科璞已雕形容振振與蕭蕭曾因忠厚方周德
坐想訐謏覽舜韶漢德已衰還應孽魯邦既弱不為妖
虛齋自是驚人翫不勝雄狐逐怒鵬

題異獸圖

明
歸有光

昔年曾讀山海經所稱怪獸多異名仲尼刪書述禹貢
九州無過萬里程搏木青羌何以至伯益所疏疑非真
西旅底貢召公懼作書訓誡尤諄諄周史獨著王會篇
睢盱百怪來殊庭載筆或是誇卓犖傳久孰辯偽與誠
雖然宇宙亦何盡環海之外皆生人陰陽變幻靡不有
異物非異亦非神曾聞漢朝進扶拔唐時方貢來東旌
壹角馬尾出絕壁綠毛忽向人間行近代所聞非孟浪
往往史牒皆有徵今之畫者何所似母乃誕謾不足憑

考古圖記豈必合任情意造皆成形畫狐似可作九尾
赤首圜題隨丹青嗚呼孰謂解衣盤礴稱良史不識騶
牙與麟趾

題獅子搏虎圖

明

王世貞

山君夜嘯山月迷當其所遇無衡蹄何來斗尾青狻猊
萬木草偃天為低兩雄相值其一雌須臾力盡氣亦奪
欲竄不竄足如絀哀嘯踣地地欲裂金精淪光夜深發
身作狻猊掌中血君不見赤豹慄玄熊靡狐兔走為麋

鹿喜爾曹肉余行及爾風塵草昧人自奇男兒墮地須
知幾又不見李密未遇秦王時

縛虎圖

宋
司馬光

孫生非畫師趣尚頗奇偉為人少諧合不肯畜妻子時
時入深山信足動百里蕭然坐盤石盡日曾不起精心
忽有得縱筆何恢詭萬象皆自然神工相表裏流傳落
人間萬金易寸紙君家縛虎圖用意尤精緻雖云鎖紐
牢觀者猶披靡昔聞劉綱妻制虎如犬豕繫之牀脚間

垂頭受鞭箠孫生僕未見畫此亦何理明知非世人羽
化實不死願君他日歸置之成都市必有乘槎人庶幾
能辯此

虎圖

宋

王安石

壯哉非熊亦非羆目光夾鏡當坐隅橫行安尾不畏逐
顧盼欲去仍躊躇卒然我見心為動熟視稍稍摩其鬚
固知畫者巧為此此物安肯來庭除想當盤礴欲畫時
睥睨衆史如庸奴神閒意定始一掃功與造化論錙銖

悲風颯颯吹黃蘆上有寒雀驚相呼槎枒死樹鳴老烏
向之俛喙如哺雛山牆野壁黃昏後馮婦遙看亦下車

陰山畫虎圖

宋

王安石

陰山健兒鞭輻急走勢能追北風及逶迤一虎出馬前
白羽橫穿更人立回旗倒戟四邊動抽矢當前放蹄入
爪牙蹭蹬不得施磧上流丹看來濕胡天朔漠殺氣高
煙雲萬里埋弓刀穹廬無工可貌此漢使自解丹青包
堂上絹素開欲裂一見猶能動毛髮低徊使我思古人

此地搏兵走戎羯禽逃獸遁亦蕭然豈若封疆今晏眠
契丹弋獵漢耕作飛將自老南山邊還能射虎隨少年

題畫虎

宋樓鑰

一虎弭耳行一虎立而顧猛鷲乃天資亦爾相媚嫵媚
嫵尚眈眈況復逢其怒吾聞宣城包今古稱獨步投老
筆愈精爪牙利可怖方其欲畫時閉戶張綃素磨墨備
丹彩飲酒至斗許解衣恣盤薄手足平地踞顧盼或騰
拏窺之真如虎投筆一揮成神全威不露此其真是歟

為我振蓬戶藜藿將不採何止說狐兔

和南山弟虎圖行

宋

何夢桂

高堂突兀生崇岡於菟眼電牙磨霜古言市虎人不信
誰信挾一來座傍衆犬僵仆兒輩走猛士腰弩成蹶張
老翁卒然亦驚怪便欲騎取參西皇乾坤沴氣產尤物
誰為驅雷入神筆古樹蕭蕭風刁刁陰崖幽幽雲墨墨
橫行顛負不畏人弄子庭除成穴窟藍田飲羽驚夜行
今乃捋鬚當白日畫圖畫虎心自知觸目或疑猶喘息

世間多少涪邨民毛爪未完心已易

題伯時畫揩痒虎

宋

黃庭堅

猛虎肉醉初醒時揩摩苛痒風助威枯楠未覺草先低
木末應有行人知

題伊陽楊氏戲虎圖

元

元好問

大斑哆笑口侵耳小斑蓄縮如乞憐戲鬪真成兩勁敵
發機誰在卞莊前

趙生水墨虎

元

劉因

南山鬱鬱煙霧濛北山落日薄幽叢先生眼花臂猶健
聞虎有真心愈雄聲絃寄目黃蘆東人言此是高堂中
仰天大笑出門去時危慘澹來悲風

趙邈齋伏虎圖行

元
郝經

南山射虎曾得名壁上忽見令我驚何物敢爾來戶庭
屢叱不動仍生獍畫師前身是山靈胸中有虎無丹青
老櫟數筆平埽成殺氣慘澹猛氣橫頭顱半妥蹲孤城
怒尾倒插霜旌鐵鬚張磔疑有聲赤吻瀝血猶帶腥

抱石欲臥伏欲騰爪入石角瞳不瞑寒電夾鏡騫兩睛
四座凜凜陰風生威稜神采出典刑邈齷乃是金天精
憶昔詩家杜少陵酷愛賦馬并賦鷹為憐神俊故屢稱
我今賦虎亦有徵要得猛士建太平坐令四海皆澄清
吁嗟擲筆還撫膺世間道路多棘荆俚鬼磨牙不可行
趙邈齷虎圖行

元
王惲

巔崖老樹纏冰雪石觜枒杈橫積鐵北平山深林樾黑
下雖有徑人跡滅眈眈老虎底許來抱石踞坐何雄哉

目光夾鏡尾束胯百獸却走潛風埃趙侯欲盡神妙功
都著威稜阿堵中想當礧礧嘆墨時衆史縮手甘凡庸
至今元氣老不死神物所在纏陰風前年驅馬下靖邊
崖東突起草底眠腰間恨無鐵絲箭寢皮食肉空長歎
今朝過喜一嚼快熟視鬚頂為摩編貨馴跼服暴戾息
弭耳道義思拳拳主人愛玩中有謂遇事炳變通經權
我聞漢家大獵隍冰天豸冠思賦長楊篇四方猛士今
雲合早晚龍旂到渭畋

畫虎圖

贈真一先生

元 虞 集

獵獵霜風木葉乾
月明曾過越王山
青龍久待蟠仙鼎
赤豹相呼守帝關
終歲采芝茅阜曲
豐年收穀杏林間
誰家稚子能為御
長與桃椎共往還

題黃敬申虎圖

元 虞 集

當時玉帳蜀雲西
坐嘯風生草木低
傳寫餘威千載外
空山藜藿尚萋萋

題虎圖

元 陳 旅

於菟嘯林風怒生草木瑟縮空山驚斧牙鑿齒新發矸
去食田豕求西成伊昔報祭先嗇并誰復罵汝偷犧牲
包生磔磔圖金睛懸之高堂氣馮陵游光野仲急遁形
西阿執鉞神赫靈

題百禽噪虎圖

元張渥

短草空山怒養威百禽驚噪向斜暉寢皮食肉堪憐處
且喜將軍出獵稀

畫虎

明汪廣洋

虎為百獸尊罔敢觸其怒惟有父子情臨行更相顧

虎引子圖

明王佐

嗟彼猛虎羣縱橫負隅穴眈眈勁氣噴桓桓威武烈一
嘯風木號兩眸電光掣惟有父子心相從復相挈

虎圖

明方孝孺

踴躍谷生風崢嶸百獸中豈知王者瑞足不履生蟲

題虎

明周述

長松落落盤蒼龍下有猛虎來腥風雙瞳夾鏡懸秋月

長嘯一聲山欲裂獨行眈眈勢莫當百獸辟易安敢嘗
郡中賢侯今始遇昨夜分明渡江去

顧進士所藏畫虎

明

王直

趙廉畫虎名天下好事求之不論價披圖忽然見此物
坐臥雖殊貌閒暇岡頭樹綠風氣涼下有流水聲浪浪
蕭條古路絕行迹但見藜藿如人長深山麋鹿可充腹
莫向田家取黃犢禍機一發戕爾軀豈若安常一身足

題李都督虎

明

邱濬

陰雨颼颼振林木百獸魂飛草中伏舉首為旗尾作旌
白晝橫行誰敢觸汝虎雖猛何如人慎勿夜逢李將軍
將軍射石尚沒羽薄肉淺毛何足數

題畫虎

明
劉溥

千山萬石日向晡啞啞老樹愁啼鳥長途迢遞人絕跡
奮躍只有黃於菟長風颼颼震林木百獸紛披望風伏
霜牙凜凜摧萬夫金鏡瞳瞳射雙目飢來擇肉惟熊羆
不更小取豺與狸田家黃犢要耕種又肯搏攫誇能為

金史卷一百
如今天闕求守備蓋世雄威素稱異舉首為城掉尾旌
願保皇家千萬世

題虎圖

明
程敏政

一嘯風生百草枯陰霾消處見於菟眼中頗覺妖狐靜
不道相看是畫圖

畫虎

明
吳寬

是誰捉筆圖猛虎出山眈眈氣尤怒便欲當前一扼之
自笑書生不能武亂山西繞洞庭波山下爭傳虎跡多

千年故事劉昆得何日偶然來渡河

題內苑蓄虎圖

明 廖道南

禁籞金飈起山君氣象雄飛熊緣有兆變豹迴相同錯
落搖星彩熒煌閃電瞳誰從東觀地圖畫附真龍

畫虎行

明 陸燦

山人示我畫虎圖邀我為作畫虎行我生城郭不識虎
向來浪說真無憑自從謫居傍夷落時驚夜嘯風生壑
似聞行旅遭搏食往往白骨撐叢薄朝來擊鼓驅獵徒

於菟中箭人謹呼兒童奔走我亦俱近前諦視摩其鬚
初觀據地疑未死金睛熒熒吻血紫却歸更與展圖看
意態猙獰宛相似畫手爾何人誰遣為此筆丹青淺事
何足問物理試思堪太息我聞太平世野獸恒避人吁
嗟猛虎今為羣渡河無復逢劉昆黃公赤刀俵鬼竊裴
旻李廣俱澌滅書生徒手無寸鐵對畫空令雙眦裂還
君畫為君歌道上虎跡今轉多

題虎

明
林景清

壯哉負猛氣玄文連舊斑雙睛夾明鏡據地當南山
山百獸不敢出遠近聞風心膽慄空林巡遶張雄威掉
尾磨牙如待食一聲長嘯懾萬夫松梢靈鵲驚相呼飛
雲谷口日將暮大風颭颭吹黃蘆吁嗟惡性本可怕人
有善心當感化君不見劉昆牧伯異政多負子曾看遠
渡河

為舟人萬氏題象圖

明 張以寧

雪白雙牙雲滿身日南萬里貢來馴遠方奇物真堪畫

却是中州有鳳麟

黃精鹿

宋

蘇軾

太華西南第幾峰
落花流水自重重
幽人只采黃精去
不見青山鹿養茸

右丞文獻公著色鹿圖

元

元好問

野鹿標枝氣象閒
先皇頻歲赦秋山
不妨右相丹青筆
時到霜林紫翠間

子和麋鹿圖

元

元好問

白髮刁騷一禿翁
塵埃無處避西風
野麋山鹿平生伴
惆悵相看是畫中

題小薛王畫鹿

元
鄧文原

禮樂河間雅好儒
曾陪校獵奉鑾輿
畫長靈囿觀游後
政暇嘉賓燕集餘
蛺蝶圖工人去久
騶虞詩好化行初
宗藩翰墨留珍賞
憑仗相如賦子虛

畫鹿行

明
許穀

古來寫鹿誰最賢
耶律以後皆無傳
吾鄉近推快園叟

毫端物態俱天然快園野叟氣豪蕩此圖全得山林象
疑從靈囿翻然來走入君家錦堂上玄圃平開藥草生
靈泉倒瀉溪流清溪邊跂跂似求侶草畔咩咩如有聲
野叟風流不可見彩筆見貽足珍玩霜毫豈羨芙蓉園
銅牌未數宜春苑憐君自是金生者百年意興惟原野
世路逃名不受羈雲厓結伴寧相捨予本江南一散人
悔將書劍誤風塵披圖便欲捐簪珮共採苹蒿樂性真

題易元吉畫麋

宋

陳與義

紛紛騎馬塵及腹名利之窟爭馳逐眼明見此山中吏
怪底吾廬有林谷雄雌相對目炯炯意閒不受榮與辱
掇皮皆真豈自知坐令猶犬羞奴僕我不是李衛公欺
爾無魂規爾肉又不是曹將軍數肋射爾不遺鏃明牕
無塵簾有香與爾共此春日長戲弄竹枝聊卒歲不羨
晉宮車下羊

次韻三司蔡襄獐猿

宋
趙 忬

獐狎猿馴遂性情恍然疑不是丹青豈憂夜獵林中去

只欠秋吟月下聽舉目便同臨澗谷此身全恐寄郊垌
山容野態窮微妙造化爭功六幅屏

觀易元吉獐猿圖歌

宋 秦觀

參天老木相樛枝嵌空怪石銜青漪兩猿上下一旁挂
兩猿熟視蒼蛙疑蕭蕭叢竹山風吹海棠杜宇相因依
下有兩獐從兩兒花餐草嚙含春嬉易老筆精湖海推
畫意忘形形更奇解衣一掃神扶持他日自見猶嗟咨
金錢百萬酒千鷗荆南將軍欣得之老禪豪取索為垂

白晝掩門初許窺
房櫳炯炯明冬曦
榛叢羽革分毫釐
殘編未終且歸讀
歲暮有閒重借披

題胡處士猿麋圖

宋陳造

畫工神品今代無
祁嶽一脈傳醉胡
幾年傲睨不落筆
乘興埽出赤縣圖
今君所寶亦第一
我疑神遇非有筆
青林紅葉晚未暝
遙山遠水秋一色
五猿踞石相因依
兩猿挂樹松枝低
仰睇側顧麋善疑
其二行齒如不知
昔人畫馬師廐馬
畫山直付居山者
野猿不馴麋易驚

邈影渠能寫閒暇草露空荒遠刀機即今放麕誰氏子
山峰負毒不足憐盍貸蠪蛸留報喜

和楊龍圖麕猿屏

宋 蔡襄

畫莫難於工寫生麕猿移得上幽屏相逢平野初驚顧
共向薰風適性靈引子畫遊新草綠嘯羣時望故山青
可憐官省沈迷處每到中軒頓覺醒

酬李公擇謝子贈范李猿獐

宋 郭祥正

黃麕雄領雌青猿母抱子一落置網中城市就生死不

如畫圖上山深石泉美水無罝網憂精神自全耳愛之
寫橫軸容易被案几動靜適自感物我忘表裏猶疑跳
擲去毫端詎能止易生名獨擅斯人嗟往矣後來稱范
李贈君君勿鄙縱令筆未妙猶勝負塗豕

題易元吉獐猿兩圖

二首

宋 范成大

擇食麋相喚無人意不驚猿啼雨動葉機熟兩忘情
鳥逐山公噪驚麋仰望疑春林無一事猶我自生悲

題獐猿圖

金 党懷英

雲山空岡阜重榭葉半濕新霜紅溪猿得意適其適閒
攀靜挂晴光中孤麕何從來寂歷野竹風舉頭相視不
相測昂藏却立如癡童鯤鵬負雲天斥鷃處蒿蓬萬生
所樂自不同恣然胡為之二蟲

惠崇獐猿圖

元
元好問

月嘯煙呼本不羣筆頭同是一溪雲野情山態令人羨
世路機關不似君

畫猿

元
劉因

萬古西山只月明畫中依約曉猿鳴幽人未去深須聽
一出世間無此聲

獐猿圖

元
袁
桷

細草豐茸古洞斜柯歷落寒雲信道乾坤消息端須類
聚同羣

畫猿

元
虞
集

冷泉亭下呼常到巫峽舟中聽更愁老石枯藤還見汝
因懷經處思悠悠

孝猿圖

元 程鉅夫

三生石上性長存
死別如何不斷魂
開卷故人還滿眼
此情今更不堪論

題猿圖

元 馬祖常

江渚無來鴈
山樊有宿猿
秋高盧橘熟
巴月樹連邨

題猿

元 李 祁

冷泉亭上呼嫌少
巫峽舟中聽厭多
白髮老人宵夢短
月明孤館奈君何

猿鹿圖

元 牟 巖

野鹿正周張猿投兩臂長由基方逞巧何似總相忘

胡孫圖

元 牟 巖

山果包已盡充然兩噉中雄雌自相命槲葉老秋風

題山月猿圖

元 僧恕中

水中明月輪可翫不可覓獼猴徒自狂觸破寒潭碧

題周進士古木清猿圖

明 黃 玄

昔從錦城來却遇愁猿道千崖萬嶂不可聞此中哀怨

令人老況是西江秋水來衝波逆折鳴風雷攀蘿涉水
苦難度騰枝抱子俱縈迴空林陰陰不知處前驚後呼
若相語正當絕險凌天梯攬轡聽來淚如雨君不見蠶
叢開國通秦關六龍西幸仍躋攀猿聲鳥道有如此一
為長歌行路難

題水底猿捉月圖

明
樊 甫

漏板敲愁夜驚冷露井梧桐濕無影海風吹星消碧煙
青天不見纖月懸嫦娥淚泣桂香死誰知兔魄沈水底

巫猿激烈心欲飛便伸長手撈摸之夷神叱咤蛟龍怒
翻倒滄海上天去

題畫兔

宋
陳與義

碎身鷹犬慙何忍埋骨詩書事亦微霜落深林可終歲
雄雌暖日莫忘機

畫兔

金
李純甫

三窟言何鄙中林計未疎貧而長衣褐老矣不中書搗
藥元無死忘蹄始見渠子皮今尚在遺像豈陶朱

畫兔

元程鉅夫

君王罷游獵重德不重射狡兔秋田中食粟得閒暇

畫兔

元程鉅夫

足撲速眼迷離嬌兒宛頸雌雄隨安知搗藥明月裏
夜天寒月如水

題畫兔

呈馬伯庸學士

元楊載

姮娥乞與長生藥自可騰空入月中竊食草間多利害
飢鷹奮擊待秋風

題畫兔

元
李祁

毛穎多年禿未更小牕題字苦難成
何時會獵中山下
拔取霜毫付管城

畫兔

元
吳師道

孕靈廣寒府承寵中書署誰令秋水邊
弄月淒風露

黃荃子母兔

明
高啓

陽坡日暖眼迷離芳草春眠對兩兒
誰道嫦娥曾作伴
廣寒孤宿已多時

畫兔

明 傅珪

搗藥年年住廣寒
瓊漿時吸桂花丹
何人最慕仙家景
移取霜毛畫裏看

玉兔圖

為許學士
思仁題

明 廖道南

龍圖學士人中龍
孤忠直氣稱豪雄
蛟螭蟠拏走雷電
鸞鳳迴翥流雲虹
秋軒示我月宮兔
霜毫雪質凝輝素
搗藥真調霞液丹
含英似挹冰壺露
玉宇何年種樹成
桂枝繚繞桂花明
仙娥舊住玄霄闕
天使今棲銀漢京

學士懸弧當卯歲昭陽單闕開祥瑞咸稱明眎玉衡精
奎章壁緯人文貴嶽降還當東魯東星分危室地靈鍾
岱宗秀結千巖雨瀛海濤驅萬里風竭來侍從蓬萊殿
橫經講幄承清燕彤管常從石室揮瑤篇屢向蘭臺撰
誰云天畢張虞羅指揮意象迴鑾坡中山漫著昌黎傳
潁水還憐水叔歌我為君歌酌君酒維南有箕北有斗
君歸持捧獻高堂萊衣遐祝靈椿壽

題畫免

明
張鳳翼

不從東郭困韓盧亦任田中笑守株千載獨傳毛穎傳
常留姓字與人呼

題扇芙蓉兔

明

祝允明

霜寒玉線亂秋衣葉重花深草氣肥靈藥更無人肯餌
素娥應道不如歸

御定歷代題畫詩類卷一百

欽定四庫全書

集部

御定歷代題畫詩類卷一百二

詳校官刑部侍郎_臣李封

主事銜_臣徐以坤覆勘

總校官降調編修_臣倉聖脉

校對官中書_臣高 中

謄錄監生_臣吳祖升

欽定四庫全書

御定歷代題畫詩類卷一百一目錄

獸類

畫馬篇

唐高適

同鮮于洛陽於畢員外宅觀畫馬歌

唐高適

梁司馬畫馬歌

唐顧況

和叔益畫馬次韻

宋蘇軾

馬圖同裕之賦

金李純甫

畫馬為邢將軍賦

元元好問

畫馬

元程鉅夫

畫馬

元許有壬

畫馬

元虞集二首

畫馬

元范梈

畫馬

元成廷珪

題畫馬圖

元薩都拉

畫馬

元張翥

畫馬 元貢師泰

題畫馬 元丁復

題畫馬 元薛漢

畫馬行 元吳萊

題畫馬 元李祁

畫馬歌 元戴良

畫馬 元貢性之二首

畫馬 元錢惟善

題畫馬

元唐肅三首

題馬

元屠性二首

畫馬

元張庸

題畫馬

明張以寧

畫馬

明徐尊生

題江陰侯杜安道宅畫馬

明陶安二首

畫馬

明楊基

畫馬

明徐賁三首

畫馬

明許伯旅

畫馬

明趙迪

畫馬

明劉績二首

題馬

明丘濬四首

畫馬

明李東陽二首

畫馬

明姚綸

畫馬

明莊杲

畫馬

明蔣冕二首

畫馬

明傅珪

畫馬行

明鄭岳

題畫馬

明陳雷

題馬

明王直

題畫馬

明李堅

題畫馬

明王景彰

題畫馬

明僧妙聲四首

題趙翰林唐馬

元陳基

唐馬圖

元吳師道

題唐馬圖

明王穰

題唐人馬圖

明偶桓

題畫唐馬

明溫肅勳

唐馬圖

明倪敬

題唐馬

明桂敏政

唐馬篇

明丘濬

芸牕集畫圖

宋何夢桂

御定歷代題畫詩類卷一百一目錄

欽定四庫全書

御定歷代題畫詩類卷一百一

獸類

畫馬篇

同諸公宴睢陽李
太守各賦一物

唐

高適

君侯握上驄貌在丹青中
馬毛連錢蹄鐵色圖畫光輝
驕王勒馬行不動勢若來權奇
蹴踏無塵埃感茲絕代
稱妙手遂令談者不容口
麒麟獨步自可珍
駑駘萬匹知何有
終未如他檉上驄
載華轂兮騁飛鴻
荷君剪拂

與君用一日千里如旋風

同鮮于洛陽於畢員外宅觀畫馬歌

唐
高適

知君愛鳴琴仍好千里馬
永日恒思單父中有時心到
宛城下遇客丹青天下才
白生胡雛控龍媒主人娛賓
畫障開只言騏驎西極來
半壁趨勢不住滿堂風飄
颻然度家僮愕視欲先鞭
攬馬驚嘶還屢顧始知物妙
皆可憐燕昭市駿豈徒然
縱令剪拂無所用猶勝駑駘

在眼前

梁司馬畫馬歌

唐顧況

畫精神畫筋骨一圖風瞥滅沒仰秣如上賀蘭山低頭
欲飲長城窟此馬昂然獨出羣阿爺是龍飛入雲黃沙
枯磧無寸草一日行過千里道展處把筆欲描時司馬
一駒賽傾倒

和叔益畫馬次韻

宋蘇軾

天驥德力備馬外龍麟中皇天不遣言元與畫圖同駕

駘飽官粟未受一洗空十駕均一至何事籟雲風

馬圖同裕之賦

韓筆定襄霍
益之家物

金李純甫

天馬飛來不苦難雲屯萬騎開元間太平有象韓生筆
曾見真龍如此閒

畫馬

為邢將
軍賦

元元好問

大宛城下戰骨滿駘駘入漢龍種藏將軍此紙何處得
便覺房駘無光芒人中馬中兩勍敵天門鴈門皆戰場
并州父老應相望早晚旌旗上太行

畫馬

元 程鉅夫

耳峻蹄高目有隅
肉髮磊砢立奚奴
承平誰用千金買

空使閒人畫作圖

畫馬

元 許有壬

惆悵孫陽世久無
紛紛駕驥遂齊驅
不教神物俱湮滅
猶幸人間有畫圖

畫馬

二首

元 虞集

蕭條沙苑貳師還
首宿秋風盡日間
白髮圍人曾習御

長鳴知是憶關山

號國夫人學畫眉宮門催入許先馳春風十里聞鄉澤
新賜金鞍不受騎

畫馬

元
范梈

一自房星下渥洼龍媒多在玉皇家赤毛灑血微生汗
黑暈搏雲整作花不待老能知失道固應來是涉流沙
如今豈少真神駿猶有丹青紙上誇

畫馬

元
成廷珪

圍人爭喜得驊騮撥入天閑早見收今日有誰憐駿骨
西風沙苑疾藜秋

題畫馬圖

元
薩都拉

漢水揚波洗龍骨房星墮地天馬出四蹄蹀躞若流星
兩耳尖脩如削竹天閑十二連青雲生長出入黃金門
鼓鬃振尾恣偃仰食粟何以酬主恩豈堪碌碌同凡馬
長鳴噴沫奚官怕入為君王駕鼓車出為將軍靜邊野
將軍與爾同死生要令四海無戰爭千秋萬古歌太平

畫馬

元 張翥

睿思殿中萬幾暇，縹帶犀籤閱名畫。君王愛此神駿姿，
筆勢不在韋韓下。五雲御押手自封，玉窠蟠屈宸篆紅。
百年重遭赤馬劫，散落不逐兵塵空。誰歟傳之能愛惜，
尺楮蕭蕭開古色。驪駒玉面蹄踈白，青絲絡腦黃金勒。
風鬣半散頭怒側，一團渥洼雲氣墨。緋衫圍郎緊控持，
直恐驕騰收不得。向來南渡小朝廷，虎視欲與金源爭。
蜀襄馬場能幾匹，尚想按圖心膽傾。只今萬里龍沙道，

游牝千羣飽豐草天閑上駟皆乘黃駕蹇紛紛世空老

畫馬

元
貢師泰

漢家旌節渡流沙奪得戎王鐵喙駟天上白魚秋弄影
月中玄兔夜生花九圖妙入將軍筆八駿神空阿母家
獨控奚官更超絕長楸錦隊爛如霞

題畫馬

為方遠
上人賦

元
丁復

上人超世資脫然了無為猶有愛馬癖或比道林支天
馬由來出天池西大宛國乃有之房星寫神孕龍漿雄

志倜儻精權奇飛行滅沒電莫追空塵留煙不得窺月
氏之夷那敢騎漢武遠慕穆天子欲躋崑崙游具茨遣
使先開玉關道鳳頸虎翼初就羈王良造父死已久當
時不知馭者誰唐人為馬置馬監奚官果是何物兒況
復教之作馬舞跪拜起伏取笑娛伏仗能鳴輒引去俛
首低摧青絡絲欲從駑駘服轅下局促動遭華策施非
徒喪志失天性病骨瘦柴如宛錐所以韓幹為畫肉不
忍神駿成凋羸大漠茫茫天作屋飢飮飽臥驕且馳蒲

梢蕭颯輕風度
首宿參差新雨滋
胡為束縛對廝養
長嘶無聲情內悲
我豈伯樂知馬者
意與馬類傷馬時
自從眼前見此卷
把軸起坐斂更披
上人之意無乃爾
笑絕長題畫馬詩

題畫馬

元
薛漢

渥洼龍媒少人識
世上駑駘日充斥
班生畫馬畫兩匹
駿骨雄姿殊未得
赭袍烏幘坐奚官
似出春風十二閑
掩圖不語三太息
我方垂耳鹽車間

畫馬行

元吳萊

涼秋八月霜皓皓白鴈驚飛散蓬葆川原蓄牧萬馬來
揚鬣攢蹄齧枯草漁陽突騎自有真奚官翦拭傾城閨
素絲結轡美無價繡罽披韉驕向人當塗奮擲森崛壯
一旦紛騰入天仗父老東城接鬪雞胡兒內苑隨調象
煌煌京洛鳴和鈴奔走萬里如流星筋力追風烏鵲厲
精神噴霧蛟龍冥往年踴躍將一跨寂寞而今空見畫
黃金鑄式猶崢嶸多少地上麒麟行

題畫馬

元李祁

玉面霜蹄汗血姿黃金高價有誰知
不嘶不動從羈絆記得彤庭立仗時

畫馬歌

元戴良

吾聞唐家有馬名胡騮寫入尺楮百千秋
是何筆力妍且勁眼底飄飄盡龍性此馬曾經百戰來
豐姿逸態何雄哉功成未受伏櫪惠愁對青驪若相語
隰公愛馬兼愛畫市以千金豈高價流傳幾手到南荒
夏贇兄弟今

襲藏年深物化使我傷萬里驍騰苦無日徒遇伯樂與

王良

畫馬

二首

元
貢性之

偃蹇龍駒不受羈貢來遠自渥洼西天閑立仗歸來晚
猶向東風振鬣嘶

天閑牽出許

一作自

奚官飲罷春流未解鞍記得曾陪仙

仗立五雲深處隔花看

畫馬

元
錢惟善

西風弄影四蹄霜背有連錢匹練光神駿何曾受羈馭
蕭蕭想見華山陽

題畫馬

三首

元
唐肅

曾充天廄浴天池太僕尋常不敢騎金粟堆荒松柏老
鳳頭猶絡舊青絲

四十萬中新選得拳毛一色鬱金黃在前正立教牽過
不賜岐王定薛王

金池春水勝湯泉浴罷雙龍乍試鞭明日君王獵西苑

勅教都被紫駝羈

題馬

二首

元屠性

渥洼神水與天通
汗血淋漓帶赤駿
明日甘泉祠泰畤
和鑾聲在五雲中

曉來疎雨過沙堤
振迅先聞柳外嘶
不是圉人調未習
臨流怕濕錦障泥

畫馬

元張庸

年少奚官綠綺裘
憶曾何處鞚驂騮
半堤草色連鍾阜

數點桃花出御溝

題畫馬

明
張以寧

滿身雲濕出滇河九折羊腸抹電過
天殿飛龍今百萬
儘渠飽臥夕陽坡

畫馬

明
徐尊生

白馬披朱韉牽來過御前
憶曾何處見金水小橋邊

題江陰侯杜安道宅畫馬

二首

明
陶安

洗罷桃花浪暖時
羣空冀北見權奇
五花雲濕青絲鞵

百戰功成不自知

房宿何年寓世間
四蹄踣鐵度天山
沙場酣戰誇神駿
奏凱歸來十二閑

畫馬

明
楊基

古人畫馬如畫竹
貴在蕭蕭去凡俗
骨欲權奇尾欲輕
不用豐鬃與多肉
當時精妙稱曹霸
人與驂騑意俱化
信筆為之自有神
忘却龍媒是圖畫
此馬滿身花作團
大宛三日到長安
若教引見南薰殿
應賜殷紅瑪瑙盤

畫馬 三首

明
徐賁

拳毛零落暗塵埃何似春風立仗回當日外番初進奉
不知傳勅賜誰來

親曾調馬動天顏看遍東風十二閑今日寫真圖畫裏
一雙龍駿在人間

立仗歸來出御堤圍官為解錦障泥春流芳草無人渡
得向東風自在嘶

畫馬

明
許伯旅

曹韓畫馬久絕筆近代狀者多駑駘毫端不得千古意
孰識世有真龍媒圖中此馬何所似人言昔產余吾水
一聞高價傾千金更覺雄心少千里雙瞳爍電筋權奇
索不可繫何言咎變化應隨霹靂去死生或與英雄期
涓人買骨吁可怪漢武勞師動橫潰豈知神物在人間
驪黃迴出天機外我生愛馬癖莫醫眼見畫圖神欲飛
滎河真種當可致西坂弱水扶桑歸

畫馬

明
趙迪

塞北胡兒控驕驪豈知天廐有乘黃春風馳道花如錦
玉勒驕嘶出建章

畫馬

二首

明
劉績

曾蹴交河度黑山霜蹄颯颯汗斑斑如今四海無征戰
老向春風十二閑

雙駒汗血已斑斑蹀躞春風意態閒聞道千金求駿骨
不應龍種在人間

題馬

四首

明
丘濬

天生駿骨異尋常
午夜房星照地光
冀北隴西搜索徧
歸來內苑有飛黃

俗眼紛紛看畫圖
不求神氣論形軀
世間不獨孫陽少
韓幹江都今也無

追風逐電去如飛
奮迅長鳴不受羈
莫向人前誇駿骨
將軍偏不喜烏騅

冀北由來是馬鄉
尋常十匹九飛黃
不知地產隨時變
剛把凡胎詫作良

畫馬 二首

明 李東陽

健馬奔泉如渴虹活馬浴水如游龍
竦身作勢蹴厚地仰首噴沫生長風
倦思滾塵痒磨樹似是馬身通馬語
莫將意態問丹青天機正在忘言處

前馬奔騰後馬逐沙苑東來曲江曲
相遭意氣兩不平踏盡長堤春草綠
奚官一騎高如山金鑲玉勒聲珊珊
會呼羣駿出雲霧同立春風十二閑

畫馬

明 姚綸

何年來駿骨畫史貌能真千里電一掣五花雲滿身香
塵金谷道青草玉關春獨立渾無侶長鳴似向人

畫馬

明
莊 泉

野草寒風捲雪乾病軀斜閣瘦欄干相逢蜀豆人間者
誰把行天步驟看

畫馬

二首

明
蔣 冕

千金駿骨本空羣一入天閑更絕塵元狩樂歌今不作
松陰空老渥洼身

來如奔電去如風百萬驚駘一洗空誰遣時清烽燧熄
朝朝羈束柳陰中

畫馬

明
傅珪

霜蹄汗血勒朱幘老氣曾空冀北羣此日天閑聊縱目
分明箇箇五花文

畫馬行

明
鄭岳

房星耿耿明碧落神駒墮地走沙漠天閑秣飼列奚官
逸氣俛就青絲絡古來神駿豈易畜遺貌至今動人目

碑旣爭看骨格奇人間萬馬徒多肉汗血染成五色紋
碧蹄高踏秋空雲蹀躞嘶鳴神彩溢此圖疑出曹將軍
渥洼異產今寂寞世無伯樂何由識但收遺骨破千金
不用按圖遠相索

題畫馬

明
陳雷

赭袍烏帽立奚官牽出春風十二閑不屬丹青傳寫妙
龍媒何得至人間

題馬

明
王直

鳳臆龍髻世不多春風飽食玉山木升中自是明時事
岱岳云亭想一過

題畫馬

明
李堅

九原難喚孫陽起天閑龍種沈注水是誰傳此千里神
逸態英姿酷憐似世情貴耳多賤目葉公龍癖紛相屬
眼前駿骨疇能知幅縑尺素爭誇毗還君此畫三歎息
物情好惡元無的

題畫馬

明
王景彰

天上房星燭地寒故教駿骨落人間如今紙上空形影
苦憶秋風十二閑

題畫馬

四首

明

僧妙聲

真龍矯矯空大羣奚官牽來氣若雲黃金骨法頗清峻
畫者似是曹將軍駑駘高驤飽芻粟白駒轅下傷局促
方今相者多舉肥莫畫權奇須畫肉

畫師胸中有全馬三馬斯須生筆下中有一匹玉花驄
似是西來大宛者不羣不食意氣豪羞與二馬同凡槽

使我見畫三太息於今誰是九方臯

皎皎白馬白於練首如渴烏目如電天閑騏驎人不見
畫師為我開生面圉人牽浴定昆池落花滿地驕不嘶
青絲絡頭無一丈挽住萬里崑崙蹄

前朝王孫善畫馬筆跡不在曹韓下君看榻上玉花驄
風骨權奇絕瀟灑却憶至元全盛時四十萬匹皆吾師
崇天門下宣入貢太僕牽來親見之李君愛馬人莫比
意氣相期論萬里千金買得真驊騮早晚騎之見天子

題趙翰林唐馬

元 陳基

王孫昔侍金鑾殿親見天街進馬來
貌得權奇大宛種
解教人世識龍媒

唐馬圖

元 吳師道

飽食天閑逸氣生只愁立仗誤長鳴
青絲挽入奚官手
俛首何妨逐隊行

題唐馬圖

明 王褒

錦韉金鐸舞傾杯驛路相傳換馬臺
零落黃塵鞞鼓歇

祇從圖畫識龍媒

題唐人馬圖

明 偶 桓

內廐多龍馬
奚官晚更調
獨矜紅叱撥
老氣壓天驕

題畫唐馬

明 溫 省 勣

苜蓿含花草
露斑奚奴擾
擾出沙灣塵
飛大夏三千里
泥滿東風十二閑
直內銅符初上繳
征西鐵甲未東還
可憐絕代賢王手
少畫漁陽阿鞞山

唐馬圖

明 倪 敬

房精墜地雲氣黑龍媒貢自那耆國英風颯爽生天關
白玉鳴珂紫金勒石闌干外草茸茸一聲嘶斷落花風
只今萬乘巡遊少立盡芭蕉日影紅

題唐馬

明

程敏政

青青苜蓿長初齊十二天閑望不迷楊柳一株沙苑道
奚官來試驪驪蹄

唐馬篇

明

丘濬

開元考牧千百羣谷量色別如錦雲金羈繡韉盛裝飾

新水香萸調息勻縱橫六印帶官字牽出長街多意氣
奚奴屏息不敢騎路人斂迹遙迴避昂頭高步踏軟塵
倏來倏往如有神四海風塵那敢動鐵騎奮迅應無倫
漁陽鼙鼓一朝起四十萬匹駢頭死獨餘一匹真乘黃
負載君王蜀山裏蜀山西去棧道危此時郎當將語誰
張郎不來哥舒去獨乘千里將安之九折坂頭泥汨汨
據鞍穩坐伊誰力平時飼餼非不多逐草奔泉各南北
古來良驥惟稱德一匹勝如千萬匹今觀此畫殊不凡

天骨開張森獨立豈是三郎舊所乘錄功別養當時平
詔令畫史為圖形千年神駿還如生我一見之心神驚
何當房宿重降精再使麒麟地上行

芸牕集畫圖

宋何夢桂

天馬不生韓幹死崔白翎毛落蒿里虎頭妙筆夜通靈
主爵郎中修畫史楊君畫眼空四海賸把金奩貯奇詭
原本闕
二字牧馬邊草秋一騎一縱驂與騶阿誰青驄嚼金
勒拔劍奔逐髯怒虬提弓空捍鳴鏑盡塵沙滿耳風颼

颺簷簷谷中一梢出冷蕊相看冰雪骨葵花二色空爭
妍沒骨丹青輸水墨猿猱兩兩雄顧雌獐鼠伎伎母趁
兒水禽並下照秋水足踏枯荷浸漣漪人間清景能幾
許野馬戰場祇尺咫芸牕一幅水沈煙俯仰乾坤千古
意

御定歷代題畫詩類卷一百一

欽定四庫全書

御定歷代題畫詩類卷一百二目錄

獸類

八駿圖 唐杜荀鶴

八駿圖 唐羅隱

觀八駿圖 唐劉義

八駿圖詩 唐元稹

題八馬圖 宋范浚

八駿圖 元吳澄

八駿圖 元虞集

姚少師所藏八駿圖 明曾榮

趙松雪八駿圖 明王澤

獨駿圖 明毛直方

書韓幹二馬 宋蘇軾

韓幹二馬 宋蘇轍

題兩馬圖 宋晁說之

李龍眠二駿圖 元王惲四首

二馬圖 元王惲

題二馬圖 元貢師泰

題二馬圖 元陳基

題二馬圖 元張天英二首

二馬圖 明張以寧

雙馭圖 明張羽

二馬圖 明姚綬

二馬圖 明吳寬

題趙文敏畫兩馬行 明王世貞

韓幹三馬 宋蘇轍

詠李伯時摹韓幹三馬 宋黃庭堅

題李早女真三馬扇頭 元張翥

三馬圖 元陳旅二首

題開元三馬圖 元胡長孺

題唐申王三駿圖 元丁鶴年

題四馬圖

元薛漢

唐人四馬卷

元宋无四首

題伯時畫溫溪心等貢五馬

宋陳與義

題李伯時畫五馬圖

元戴良

宋學士所藏五馬圖

元程鉅夫

五馬圖

元王冕

集杜句題五馬圖

元韓性

五馬圖

明鎬師邵

題五馬圖

明李暉

李判官五馬圖

明羅泰

五馬圖歌

明李維楨

趙承旨天閑五馬圖歌

明王世貞

題五馬浴川圖

明陳敬宗

題方起莘五馬圖

明唐桂芳

五馬圖歌

明顧璘

題昭陵六馬圖

元陳基

任月山七馬飲飼圖

明吳寬

明皇九馬圖

宋劉子翬

九馬圖

元袁桷

題月山公九馬圖手卷

元楊維禎

任月山九馬圖

明吳寬

題韋偃十馬圖

元王惲二首

吳興趙子昂十馬圖

元虞集

題高麗行看子

宋樓鑰二首

題章存誠十三馬圖

元傅若金

韓幹十四馬

宋蘇軾

題趙松雪三十九馬圖

明曾榮

五十匹馬圖

明沈周

御定歷代題畫詩類卷一百二目錄

欽定四庫全書

御定歷代題畫詩類卷一百二

獸類

八駿圖

唐杜荀鶴

丹腹傳真未得真那知筋骨與精神
祇令試駿憑毛色
騄耳驊騮賺殺人

八駿圖

唐羅隱

穆滿當年物外程
電腰風脚一何輕
如今縱有驊騮在

不得長鞭不肯行

觀八駿圖

唐劉義

穆王八駿走不歇海外去尋長日月五雲望斷阿母宮
歸來落得新白髮

八駿圖詩

有序

唐元稹

良馬無世無之然而終不得與八駿並名何也吾聞
八駿日行三萬里夫車行三萬里而無毀輪壞轆之
患蓋神車也人行三萬里而無喪精褫魄之患亦人

之神也無是三神而得是八馬乃破車掣御躋人之
乘也世焉用之今夫畫古者畫馬而不畫車馭不畫
所以乘馬者是不知夫古者也余因作詩以辨之

穆滿志空闊將行九州野神馭四來歸天與八駿馬龍
種無凡性龍行無暫舍朝辭扶桑底暮宿崑崙下鼻息
吼春雷蹄聲裂寒瓦尾掉滄波黑汗染白雲赭華輶本
修密翠蓋尚妍冶御者腕不移乘者寐不假車無輪扁
斲轡無王良把雖有萬駿來誰是敢騎者

題八馬圖

朱范浚

何年畫工搦毛錐貌此八馬恣權奇青絲絡頭十二蹄
調柔意態行愉怡五馬放浪無維羈或齧或望仍迴嘶
一牧牽鞵一牧騎製度髣髴唐巾衣不知此馬生何時
昔周穆王遠遊嬉駕跨八駿驅東西高升崑崙躡瑤池
騶騶驥義勞飛馳日走萬里無停驂興元唐家危累基
百拳僅脫朱泚圍黃屋進狩懷光追八馬入谷七馬疲
筋攣肉綻行人悲兩者資世皆顛羸虛名何有千載垂

空得傳記流歌詩未知此馬閒猶夷牧圻不受鞭策威
不踣險遠安無危泉甘草薦足自肥安用號駿稱雲騅
嗟哉畫意誰能知

八駿圖

元吳澄

陰山鐵騎幾千匹雨鬣霜蹄神鬼出風馳雲合暗中州
蹂盡東賓西餞日豈皆驤裏與蜚黃拓土開基功第一
忽於紙上見八駿穆滿所乘最超逸如今已死骨亦朽
漫向毫端趁毛質當時造御天上藝僅到瑤池王母室

莫雪霏霏黃竹歌日行三萬竟如何逢時莫問才高下
只與論功孰少多

八駿圖

元虞集

瑤池積雪與天平西極空聞八駿名玉殿重來人世換
蕭蕭首藉漢宮城

姚少師所藏八駿圖

明曾棨

周家八馬如飛電夙昔傳聞今始見銳耳雙分秋竹批
拳毛一片桃花旋肉駿疊聳高崔嵬權奇如此真龍媒

霜蹄試蹋層冰裂駿尾欲掉長飈迴瑤池宴罷歸來早
絡月羈金照京鎬紫韉飛時逐落花雕鞍解處眠芳草
由來駿骨健且馴弄影驕嘶不動塵有時渴飲天津水
五色照見波鄰鄰圍官騎來難久駐飲向春流最深處
珠銜寶勒不敢疎直恐飛騰化龍去古來善畫韋與韓
此畫豈同凡馬看人間造次不可得首藉秋深煙雨寒

趙松雪八駿圖

明王澤

趙家王孫擅好書更復畫馬如江都嘗從玉堂罷春直

慣寫天馬隨監奴馬來西宛龍八尺勢或怒驚如鵲立
似疑初浴滎河波身上龍紋五花濕王孫寫駿不寫形
運思已入天機精都將臨池古書法落筆一掃千人驚
今逢此圖乃八匹老我見之惟歎息人間駑駘漫紛紜
天上龍紋誰購得憶昨八駿登瑤池崑崙萬里天西陲
風行電邁景恍惚翠蕤不動天王旗古來八駿雖已矣
房星在天還不死雄姿伏櫪世豈無胡乃惟稱穆天子

獨駿圖

元
毛直方

連天首宿青茫茫鹽車鼓車紛道傍獨駿汗血不可當
權奇侔儻晦若藏五之六之無留良如此獨步何堂堂
日三品豆慎所嘗天閑逸氣誰能量一尺之筮五尺韉
了與轡絡俱相忘太僕御直儼冠裳庭前榻上婉清揚
有詔有詔且勿忙一洗凡馬鑾鏘鏘我觀此圖筆意長
欲言尚寄田子方

書韓幹二馬

宋 蘇軾

赤髯碧眼老鮮卑回策如縈獨善騎赭白紫騮俱絕世

馬中岳湛有妍姿

韓幹二馬

宋 蘇轍

玉帶胡奴騎且牽銀駿白鼻兩爭先
八方龍種知何數
乞與岐邠并錦韉

題兩馬圖

宋 晁說之

前馬去駸駸年少意有餘
後馬追馳驟喘殺肥髯奴

李龍眠二駿圖

元 王惲

突啗相忘絡腦羈沙平
春靜草淒迷後人莫作丹青看

特爲南華釋馬蹄

遼夏尋盟靜塞塵
駟馬歸逸華山雲
當時驟牝三千匹
辨與龍眠策畫勲

跋龍眠二駿圖

二首

元王惲

玉塞沙平首宿繁
渥洼春水汎晴瀾
幾時扈從長楊獵
一片紅雲拂繡鞍

漢家天子狩陰山
萬馬憑凌汗血殷
早晚華陽春草地
駉駉得似畫圖間

二馬圖

元 王 惲

振鬣長鳴萬馬瘖肯教閒損絡頭金多應縱駕華清去
飛過宮前御柳陰

題二馬圖

元 貢師泰

鐵喙騶連錢驄何年墮影江水中蒲梢西來八尺龍天
閑十二爲爾空五花雲錦吹東風

題二馬圖

元 陳 基

一種權奇產渥洼暖風晴日過平沙尋常不敢施鞍韉

知是君王白鼻騮

題二馬圖

二首

元張天英

奚官浴馬試與騎一匹受鞍一匹嘶
房屋之精四飛去
昭陵風雨夜淒淒

沙陀義兒御兩馬正從梁晉爭天下
惜哉不見夾寨破
楊五功名竟獨跨

二馬圖

明張以寧

草軟沙平日暖天相摩相倚最相憐
無端走上長楸道

噴玉爭先掣電邊

雙馭圖

明張羽

內官妝束樣能齊
宛洛春風信馬蹄
共說放朝無一事
看花直到夾城西

二馬圖

明姚綬

圉人牽來馬二種
黃白紫騮氣驍勇
一朝貢獻入天閑
呈之大廷沐天寵
玉河雨晴春水滿
卸鞍浴罷東風暖
牽還雙控尚不騎
金隄芳草青猶短
青青草短非田野

此馬非伏鹽車者世無伯樂價誰增那似王孫畫中寫
曹韓已久何可作古法相傳祇如昨化龍猶恐乘長風
松雪齋前去揮霍君不見房星光墮渥洼水絕世神駒
定飛起

二馬圖

明 吳寬

紫騮嘶逐玉花驄曾是沙場百戰功今日奚官重翦拂
落花芳草灞陵東

題趙文敏畫兩馬行

明 王世貞

後馬斑黃前馬黑兩馬八蹄如雪白前人衫緋後人碧
後人上馬如上壁前人回首頓其轡後馬蹄驕欲前逝
一躍雙爭日月輪齊驅競吐風雲氣吳興筆底蟠權奇
前身伯樂真馬師飲齕立卧皆天姿我聞南人使船如
使馬胡不畫一小艇凌漣漪吁嗟嗟龍種骨立天西陲

韓幹三馬

宋
蘇轍

老馬側立鬣尾垂御者高拱持青絲心知後馬有爭意
兩耳微起如立錐中馬直視翹右足眼光已動心先馳

僕夫旋作奔佚想右手正控黃金羈雄姿駿發最後馬
回身奮鬣真權奇圉人頓轡屹山立未聽決驟爭雄雌
物生先後亦偶爾有心何者能忘之畫師韓幹豈知道
畫馬不獨畫馬皮畫出三馬腹中事似欲譏世人莫知
伯時一見笑不語告我韓幹非畫師

詠李伯時畫韓幹三馬

次蘓子由韻簡伯時兼寄李德素

宋黃庭堅

太史瑱窻雲雨垂試開三馬拂蛛絲李侯寫形韓幹墨

自有筆如沙畫，雖絕塵超日，精爽緊若失其一望路。馳馬官不語臂指揮，乃知仗下非新羈。吾嘗觀覽在垆馬，驚駘成列無權奇。緬懷胡沙英妙質，一雄可將十萬雌。決非廝養所成就，天驥生駒人得之。千金市骨今何有，士或不值五羖皮。李侯畫隱百寮底，初不自期人誤知。戲弄丹青聊卒歲，身如閱世老禪師。

題李早女真三馬扇頭

元張翥

金源六葉全盛年，明昌正似宣和前。寶書玉軸充內府，

時以李早當龍眠想當畫院供奉日飽閱天閑萬奇骨
等閒游墨落宮扇駿氣凌風欲超忽霧鬣風髮剪剔新
郎君標格玉爲人四帶紗巾繡衣領醉鞭蹋盡燕臺春
一聲白鴈黃河莫豈料征蹄竟南渡回首西風障戰塵
女仙空抱琵琶去

三馬圖 二首

元陳旅

豹股龍膺百戰餘凌煙長櫓載璫璵時平不出橫門道
願爲君王駕鼓車

郊原春草綠蒙茸三馬蕭蕭柳外風曹霸當年真絕技
只描閭闔玉花驄

題開元三馬圖

元胡長孺

牧馬極盛開元中上閑十二皆游龍時平千里不自效
嘶聲脫吻生悲風流傳八駿苦詭怪樂歌天馬徒能工
豈如杜句曹韓畫流雲飛電玉花驄吟詩展卷何獨此
未可與此爭先雄重瞳玉色五百載階榻相向將無同
誰人臨摹得高意印章彷彿龍眠公但存大畧見神駿

未傳五彩分風髮俯仰布置號進橐圖成欲上明光宮
安定王孫固英物錦標象軸留其蹤願言藏襲不浪出
駿骨隱隱驚盲聾祇今駑駘厭芻豆鹽車未贖汗溝紅

題唐申王三駿圖

元 丁鶴年

三駿英英出渥洼太平芻束飽天家誰知百戰平河北
汗血功歸獅子花

題四馬圖

元 薛 漢

世上駑駘眩凡目祇今誰識馬中龍昂頭振鬣長鳴處

似向秋風訴未逢

唐人四馬卷

四首

元宋无

金銜初脫齒新齊
蹄玉無聲赤汗微
昨日杏園春宴罷
滿身紅雨帶花歸

簇仗回來玉勒閒
黃門牽向落花間
君王不愛長楊獵
嘶入春風十二閑

霜蹄躡月早朝回
尾弄紅絲拂紫苔
日暖龍池初洗罷
尚方聞進御鞍來

太僕新調試錦韉九重日色照連錢
春來興慶池邊路偏稱宮中軟玉鞭

題伯時畫溫溪心等貢五馬

宋陳與義

漠漠河西塵幾重年來畫馬亦難逢
題詩記著今朝事同看聯翩五匹龍

題李伯時畫五馬圖

元戴良

嗚呼良馬不世出今人但尋李侯筆
五龍忽墮白雲鄉海角孤臣看自失
太平天子開明堂前驅麒麟後鸞鳳

當時此馬來萬里想見顧盼生風霜龍眠老仙亦如此
揮毫談笑羣公裏官閒祿飽少塵埃霧閣雲窻天上起
風流轉眼餘山河人間荆棘何其多臨風卷圖三太息
此馬今存知奈何

宋學士所藏五馬圖

元程鉅夫

朝飲幽并暮秣吳龍膺鳳脊紫方臚承平得此寧無用
可惜人間只畫圖

五馬圖

元王冕

太僕濟濟唐衣冠五馬不著黃金鞍飲流繫樹各有適
未許便作駑駘看鬣鬣蕭蕭綠雲聳噴沫長鳴山嶽動
世無伯樂肉眼癡那識渥洼千里種官家去年搜駿良
有馬盡拘歸監坊遂令天下氣凋喪驢騾駝駟爭騰驤
只今康衢無馬跡得見畫圖差可識畫圖畫圖奈爾何
撫几爲之三歎息

集杜句題五馬圖

元韓性

使君五馬一馬驄聲價歛然來向東飛電流雲絕瀟灑

迴立閭闔生長風肉髮磊塊連錢動大宛立仗青絲鞵
不須對此成歎嗟古來才大難爲用

五馬圖

明 銚師邵

渥洼水中產龍馬房星之精自天下星奔電掣勢莫當
豈比尋常駕轅者竹批峻耳鐵作蹄雄姿颯沓精權奇
日行三萬等歷塊未許八駿相追隨今觀此圖凡五匹
畫史經營各臻極就中一匹是真龍異質殊形人莫識
滄溟氣含雲霧涼蹴齧顧盼思騰驤神奇變化在頃刻

素壁高堂安可常

題五馬圖

明
李 暉

開元四十萬匹馬誰是超然出羣者曹韓筆力非不工
須信真龍最難寫真龍只有拳毛騮太宗騎此開唐家
雄姿猛氣世無敵當年識者久歎嗟吳興公子畫五匹
滿眼風雲起蕭瑟一匹玉花鬣且驕一匹飛黃甚飄逸
駿文殊者一匹雄一匹紫電奔長虹中央正立一匹胡
青驄遂令四馬皆下風想見承華春首藉此馬由來字

天育殷紅盤袍帽紋縠奚官杖策來監牧花萼樓前風
日遲五王宴罷何逶迤乃知畫師用心苦俟我落筆題
新詩

李判府五馬圖

明羅泰

黃堂時並駕紫陌事驅馳導從歸來晚奚官控秣時騰
身思渥水弄景憶瑤池西上還家日應辭白玉羈

五馬圖歌

有序

明李維楨

漢太守四馬加秩中二千石乃右驂故以五馬爲貴

今州在郡下守州者遂稱五馬大夫矣陳生拜鹽官
秩與州守等客以五馬圖贈屬余爲歌

神龍游戲下滇池池波鼎沸半龍釐化作龍駒五汗血
雄風閃電相追隨誰爲羈縶來燕市燕市黃金臺已矣
低垂兩耳駕鹽車畫熊朱轡不得使驤首景光懸匹練
驕嘶意氣騰千里君不見司馬相如蜀貲郎長吏前驅
謝鴈行當其困阨酒壚間但有犢鼻無驕驕相士失貧
相馬瘦世人但知牝牡與驪黃一朝邂逅九方臯目爲

丞相頭爲王九逸八駿在天閑二千石粟安足嘗

趙承旨天閑五馬圖歌

明 王世貞

吾聞天子之乘有六馬五馬無乃諸王侯飛黃一骨立
天仗茲者廿足閒清秋有金不敢將絡頭奚官屏立氣
致柔玉毫如霜落勁刷倣儻暫攝歸優游銀槽苜蓿露
不收綠波溢吻芬錦韉懸蠶齒戛快自酬宛如雙虹籊
雲浮功成身貴人不知奉車驂乘白玉墀君王縱復日
三顧此足敢忘追咸池吳興學士曹韓師寫出蹀躞千

金姿得非飲至平南時數百萬匹皆權奇嗚呼渥洼之
種悲不悲真龍却走陰山陞

題五馬浴川圖

明 陳敬宗

翩翩天廐五龍媒太液池中浴未回身散玉花雲影動
日流星彩鏡光開負圖似向滎河出孕質疑從渥水來
明日彤墀齊立仗總承恩澤下蓬萊

題方起莘五馬圖

明 唐桂芳

徐君平生愛馬癖徃徃畫手稱無敵百年物化形影存

流落生綃總陳迹今看五馬各異色兩匹驪黃一匹白
一匹翠刷雲滿身一匹虹奔汗流血奚官亦復可憐人
笑拂青絲事羈勒就中誰解驍騰姿背立如龍俄八尺
不蹠不齧有餘閒回視神光恍相射得非念同槽櫪悲
御者非人常乏食低頭帖耳或內傷十二閑中推第一
而今蹭蹬老可欺空伴駑駘無賞識嗚呼不幸世運遭
難虞豈比唐時太平日牽來錦繡動成羣玉鞍未卸黃
金勒丹墀晝靜柳陰移一點花飛墮香雪毛仲也是廐

養兒嫁女傳宣出宮掖
宮掖慣聽鼓節聲教舞銜杯增
戲劇酒狂大叫問梅花何似龔黃二千石

五馬圖歌

贈鄭紹興

明顧璘

畫圖五馬雲錦文誰其有者鄭使君
房星降靈渥洼裂龍種邁出駑駘羣
金河蹴蹋精爽振玉珂脫落權奇分
使君人異馬亦異氣概萬里含風雲
四明美政那可狀閭井小兒知禮讓
風化渾期太古前功名特出諸侯上
昨乘此馬朝王正錦韉光照長安城
天閑綠駟盈萬匹

此馬一過人皆驚鄭君五馬真絕奇鹽車局促將何爲
穆王正要追風足報爾王良伯樂知

題昭陵六馬圖

元陳基

秦王六馬一何驍生死同心鄂與褒酣戰每將戈止日
並驅長使血生毛流傳弟子初名幹服事將軍老姓曹
貌得真龍九重上昭陵刻石世同高

任月山七馬飲飼圖

明吳寬

一馬初飲泉三馬共嚙草二馬欲飲一未嚙七馬繫維

俱櫪阜圉人飲飼亦良苦莖草汲泉須美好驅馳正用
千里力不使爾渴使爾飽爾如無用却徒然天閑肥馬
雲錦連

明皇九馬圖

宋 劉子翬

書生兀兀園不窺見馬豈辨騶與驄開圖九駿立突兀
摸索知是真龍兒奔雷蹴蹋原野動曳練慘錯風沙隨
華纓金絡豈不好矯首奮迅那容羈吾聞取驥如擇士
競愛妥帖驚權奇士懷倜儻衆論斥馬有顓頊羣駕欺

六閑養固恩厚橫氣摧折常鳴悲丹青儻不逢妙手
萬世豈識真龍姿因思中原政格鬪鐵騎倏忽銀山移
著鞭安得致此物掩畫四顧徒歔歔

九馬圖

元 袁 桷

九衢塵沸各低頭水暗荒陂得自由矯首天池欲歸去
乘風緩從玉皇游

題月山公九馬圖手卷

爲任伯溫賦有序

元 楊維禎

任公月山九馬圖一卷馬官控而立者二渴飲者二

赴飲者一共檝秣者二立而昂首回顧者二昔韓幹
善畫馬實出曹將軍霸唐之畫馬稱曹韓而杜子美
評曰幹惟畫肉不畫骨則幹猶未暇入曹將軍室也
今公所畫法備而神完使在開元間未知與霸孰先
後豈獨方駕幹而已哉其孫士珪出卷求余言故爲
賦卷尾

任公一生多馬癖松雪畫馬稱同時已知筆意有獨得
天育萬騎皆吾師房精夜墮池水黑龍出池中飛霹靂

圖中九馬氣俱王都護青驄尤第一一馬飲水水有聲
兩馬齧草風雨生其餘五馬盡奇骨蠻煙洗盡桃花明
君不見佛郎獻馬七度洋朝發流沙夕明光任公承旨
寫神駿妙筆不數江都王任公一化那可復後生畫馬
空多肉此圖此馬無人看黃金臺高春草綠

任月山九馬圖

明吳寬

前元畫馬任月山九馬意態皆天閑開圖似具方臯眼
不在驪黃牝牡間日午歸來千里道渴者飲泉飢齧草

風前汗血流未乾仍見雙蹄騰櫪阜曹韓已遠圖有無
猶賴杜老詩如圖慨予何以慰馬癖空對駉駒并駒駉
唐家自得王毛仲一時下乘千金重此圖卷却勿浪開
旅葵日日宜矇誦

題韋偃十馬圖

二首

元王惲

浮深角壯恣游嬉沙苑春風碧草齊聞說紫宸初立仗
內家正要鳴嘶

國初鞍馬說江都今見韋侯十駿圖獨愛少陵忠義氣

金史卷一百二
難危安得濟時需

吳興趙子昂十馬圖

元虞集

昔在祕閣見十馬云是韋偃之所畫此圖位置略相似
心神偶同豈臨寫馬種本自渥洼來濯濯清泉更瀟灑
常恐一旦風雨至蹙蹋波濤遂神化豪雄意氣今豈無
未必深沈如此者君看最後臨岸嘶自是真龍無世價

題高麗行看子

有序

宋樓鑰

高麗賈人有以韓幹馬十二匹質於鄉人者題曰行

看子接處黃綾上書韓幹馬表飾以綾尾以精紙皆
麗物也聞其懷金來取因命工臨寫而歸之再用東
坡韻書臨本之後

竹批雙耳風入蹄霜鬣剪作三花齊相隨西去皆良種
撼首奮鬣迎風嘶丹青不減陸與顧麗人傳來譯通語
裝爲橫軸看且行云是韓幹非虛聲圉人乘馬如乘鶴
人馬相諳同呼啄中有二匹真游龍爬梳迴立綠楊風
賈胡攜金贖此馬亟呼上人臨舊畫我詩無由到三韓

寫向新圖時自看

再題行看子

宋樓鑰

先引護欄毬子驄九馬近遠俱相從黑駒駟黃驄素駒
亦有當面仍銀駿夏國一種青子藍五明錯靴皆如龍
或驂或引恣馳驟坐覺隱耳聲瓏瓏人間安得有此輩
一一必自天閑中不惟骨相異凡馬圉人貴介多雍容
三花剪鬣如官樣寶鞍更以香羅幪中間二者蓋天馬
齒雖已老氣尚雄不知幾出橫門道雙立柳下青陰濃

撻韁捩頤刷背脊旋梳駿尾搖清風人人生意馬欲動
態度曲盡各不同韓生去我幾百年藻色尚濕青與紅
不知何時墮雞林萬里遠在東海東賈人攜來得寓目
一見絕歎丹青工千金可買真不惜忽復攜去何怱怱
亟令臨寫得形似如此神駿那得逢開元內外馬盈億
色別爲羣從登封韓生所見定傑出七尺爲駉八尺駮
向來鸞邊繫金絨歸乘款段頭已童伏櫪寧能志千里
却笑區區據鞍矍鑠翁

題章存誠十三馬圖

元 傅若金

韓幹畫馬天下聞筆力遠到曹將軍忽從座右見神駿
落日蕭蕭愁莫雲雄姿利氣閒且逸霧鬣風鬣十三匹
神龍變化未可知天駟光芒有時失去年刷馬喧都鄙
紛紛殺馬輸馬耳騏驎遙依沙漠寒駑駘盡向風塵死
一作江南死江南近來一匹無君家乃得存此圖便當持獻穆
天子上下八駿同馳驅

韓幹十四馬

宋 蘓軾

二馬並驅攢八蹄二馬宛頸駿尾齊一馬任前雙舉後
一馬却避長鳴嘶老髯奚官騎且顧前身作馬通馬語
後有八匹飲且行微流赴吻若有聲前者既濟出林鶴
後者欲涉鶴俯啄最後一匹馬中龍不嘶不動尾搖風
韓生畫馬真是馬蘓子作詩如見畫世無伯樂亦無韓
此詩此畫誰當看

題趙松雪三十九馬圖

明曾榮

吾聞天馬生水中房星夜墜波光紅虎文鳳臆真異狀


一日千里能追風平原草綠春波湧雄姿逸態人皆竦
騰騫磊落如有神三十九匹皆龍種風驟霧鬣擺長雲
五花粼粼簇錦紋就中一匹獨奇絕驕嘶似欲超其羣
前年從征破強虜蹋碎陰山力如虎尾絲牽地逐流星
汗血凝珠散紅雨今年北去埽殘胡駿骨驍騰絕世無
追奔已窮沙漠盡渴飲能令瀚海枯麒麟驕驕古所惜
況此驅馳樹勲績君不見穆王八駿空爾奇弄影瑤池
竟何益

五十匹馬圖

明 沈 周

沙樹歷歷沙草荒江上誰開芻牧場馬羣所聚凡五十
飲秣而俯嘶而昂寢訖浴涉踈且驤或乳或駐或軋滄
三縱五橫不成行若驢若騏青紫黃烏騅赤兔照夜白
連錢桃花鬪文章牝兮牡兮未可辨亦莫可識駕與良
相骨相肉俱已矣老夫兩眼從茫茫但願各各無羈韁
自縱自得肥而駢肥哉肥哉空老死未識何以知爾長
我知馬亦待駕御人馬兩得氣始揚請看溝汗流血漿

爭前欲逐左賢王追風掣電一般走五十之中當有強



御定歷代題畫詩類卷一百二